《大方廣普賢所說經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 10, No. 298

No. 298

大方廣普賢所說經一卷

唐于闐三藏實叉難陀譯

如是我聞。一時佛在如來神力所持之處。與十不可說不可說百千億那由他佛剎微 塵等菩薩摩訶薩俱。前後圍繞。而為說法。皆已成就普賢之行。普賢菩薩摩訶薩。而 為上首。時眾會中。有十菩薩摩訶薩。各與十不可說不可說百千億那由他佛剎微塵等 菩薩眷屬。從十方處。忽然出現。皆坐無礙莊嚴師子之座。其名曰普光藏菩薩。甚深 藏菩薩。威德光明藏菩薩。雲音藏菩薩。金剛藏菩薩。普音不動威光藏菩薩。普名稱 威光藏菩薩。山王不動威光藏菩薩。普現眾像威光藏菩薩。十力清淨威光藏菩薩。彼 諸菩薩。出現之時。於此會中。唯除普賢。其餘一切菩薩大眾。靡不傾動。所有威光 亦盡不現。一一菩薩。皆雨十不可說不可說百千億那由他香雲塗香雲。鬘雲衣雲。寶 蓋幢幡雲。清淨世界雲。眾寶樓閣雲。菩薩眾會道場雲。大光明網普照雲。菩提道場 莊嚴雲。如來形像袈裟雲。各興如是不可思議諸供養雲。充滿法界。供養如來。斯諸 菩薩所坐之座。眾寶莊嚴。微妙清淨。於彼一一莊嚴事中。普現一切無量世界無量眾 生無量諸佛無量菩薩。又現不可說不可說過去未來無量世界。及彼諸佛。現坐道場。 為化眾生。轉妙法輪。諸菩薩眾。供養如來。淨修一切波羅蜜行。常無斷絕。爾時眾 會。咸作是念。此諸菩薩。從何世界諸佛所來。即共請問普賢菩薩。時普賢菩薩。普 告一切菩薩眾言。諸佛子。汝等各自推其來處。時無礙眼菩薩。則入普迅疾三昧。遍 至三昧。明照法界三昧。具一切神通三昧。了一切境界三昧。現一切眾生身神通三昧 。知一切佛剎三昧。入如是等十阿僧祇百千億那由他菩薩三昧。以三昧力。自見其身 。悉詣十方一切世界乃至一切微塵處中。而不能見彼諸菩薩所從來土。及於如來修梵 行處。其餘一切菩薩大眾。各各別入菩薩三昧。皆不能見。亦復如是。咸從定起。白 普賢菩薩言。我等各入十阿僧祇百千億那由他菩薩三昧。了不能見彼諸菩薩所從來處 。普賢菩薩。復告之言。彼所從來諸佛國土。甚深廣大極難可見。汝等今可更共推求 。時諸菩薩一一復入十佛剎微塵等菩薩三昧。求亦不見。各以其事。重白普賢。爾時 普賢菩薩。從座而起。上昇虛空。右繞世尊。無數匝已。即於空中。普觀眾會。作如 是言。諸佛子。汝觀佛身。無礙莊嚴。三世平等。法界諸剎。無不普入。十方所有一 切世界。一切如來。一切菩薩。一切眾生。一切諸趣。靡不影現如來身中。隨諸眾生 心之所樂。悉令開悟。汝等應住普境界眼。盡虛空界清淨慧眼。了一切境廣大智眼。 又應普請十方一切諸佛護念。皆應一心離一切處。一切依止。一切執著。一切諸有。

觀如來身。應入十力微細境界。於一境界。了達一切無盡境界。觀如來身。時諸菩薩 。敬順其教。咸向如來。頭面作禮。一心瞻仰。忽見世尊毘盧遮那。雙足輪中有世界 。名法界輪。其土有佛。名法界莊嚴王。住世說法。彼普光藏菩薩摩訶薩。與十不可 說不可說百千億那由他佛剎微塵等菩薩摩訶薩俱。從彼佛剎。來此會坐。於雙膊中有 世界名無礙藏。其土有佛名無礙淨光。住世說法。彼甚深藏菩薩摩訶薩。與十不可說 不可說百千億那由他佛剎微塵等菩薩摩訶薩俱。從彼佛剎。來此會坐。於雙膝中有世 界名真金藏。其土有佛名金藏王。住世說法。彼威德光明藏菩薩摩訶薩。與十不可說 不可說百千億那由他。佛剎微塵等菩薩摩訶薩俱。從彼佛剎。來此會坐。於雙股中有 世界名一切寶莊嚴藏。其土有佛名眾妙光。住世說法。彼雲音藏菩薩摩訶薩。與十不 可說不可說百千億那由他佛剎微塵等菩薩摩訶薩俱。從彼佛剎。來此會坐。於其臍中 有世界名毘盧遮那藏。其土有佛名毘盧遮那威德莊嚴王。住世說法。彼金剛藏菩薩摩 訶薩。與十不可說不可說百千億那由他佛剎微塵等菩薩摩訶薩俱。從彼佛剎。來此會 坐。於其心中有世界名勝光藏。其土有佛名妙相莊嚴藏。住世說法。彼普音不動威光 藏菩薩摩訶薩。與十不可說不可說百千億那由他佛剎微塵等菩薩摩訶薩俱。從彼佛剎 。來此會坐。於兩肩中有世界名金色。其土有佛名金色王。住世說法。彼普名稱威光 藏菩薩摩訶薩。與十不可說不可說百千億那由他佛剎微塵等菩薩摩訶薩俱。從彼佛剎 。來此會坐。於其口中有世界名妙寶莊嚴。其土有佛名無量光嚴王。住世說法。彼山 王不動威光藏菩薩摩訶薩。與十不可說不可說百千億那由他佛剎微塵等菩薩摩訶薩俱 。從彼佛剎。來此會坐。於其眉間有世界名法界無盡藏。其土有佛名三世無盡智。住 世說法。彼普現眾像威光藏菩薩摩訶薩。與十不可說不可說百千億那由他佛剎微塵等 菩薩摩訶薩俱。從彼佛剎。來此會坐。於其頭中有世界名覆持不散。其土有佛名寶花 積。住世說法。彼十力清淨威光藏菩薩摩訶薩。與十不可說不可說百千億那由他佛剎 微塵等菩薩摩訶薩俱。從彼佛剎。來此會坐。時諸菩薩。既見如是無盡世界如來道場 菩薩眾會佛神變已。一一皆得法界藏三昧。等十佛剎微塵數諸大三昧一切法地陀羅尼 。等十佛剎微塵數諸陀羅尼離垢藏般若波羅蜜。等十佛剎微塵數諸波羅蜜力電光。等 十佛剎微塵數一切智電光。時普賢菩薩。復告大眾。諸佛子。此法唯是行普賢行。為 善知識。所攝受者。乃得聞見。是故汝等。於此法門。作金剛心。增上意樂。說持讀 誦。勿令忘失。說此法時。彼諸菩薩摩訶薩等。歡喜信受